



BASHKIMI I SINDIKATAVE TË PAVARURA TË KOSOVËS
THE UNION OF INDEPENDENT TRADE UNIONS OF KOSOVA
UNIJA NEZAVISNIH SINDIKATA KOSOVA

Adresa: Rr. Nëna Terezë Nr. 35 10000 Prishtinë Tel/Fax: +383 38 222 859, +383 44 165 040, E-mail: bspk@bspk.org

BASHKIMI I SINDIKATAVE TË PAVARURA
TË KOSOVËS

BSPK

Nr. 28

Data. 04.10.2021

PRISHTINË

STATUT

BASHKIMI I SINDIKATAVE TË PAVARURA TË KOSOVËS (BSPK)

Prishtinë, 2021

Dispozitat e përgjithshme

1. Bashkimi i Sindikatave të Pavarura të Kosovës (në tekstin e mëtejme BSPK), është konfederatë sindikale e federatave/sindikatave, vullnetarisht të anëtarësuara dhe të organizuara sipas veprimtarive ekonomike dhe profesionale bazuar në ligjin nr. 04/L-011 për organizimin Sindikal në Kosovë;
2. BSPK-ja përfaqëson interesat e përbashkëta ekonomike, sociale dhe kulturore të të punësuarve, të anëtarësuar në Federata/Sindikata;
3. BSPK-ja është e pavarur nga qeveria, organizatat e punëdhënësve dhe partitë politike;
4. BSPK-ja gëzon të drejtën e anëtarësimit në organizata ndërkombëtare sindikale;
5. BSPK-ja promovon parimet e së drejtës sociale e demokratike, respektimin e standardeve ndërkombëtare duke insistuar në ratifikimin dhe implementimin e konventave të Organizatës Ndërkombëtare të Punës (ILO), Rezolutat Sociale të Evropës, si dhe në respektimin e të drejtave njerëzore dhe sindikale;
6. BSPK-ja operon brenda Republikës së Kosovës, në frymën e kushtetutës, konventave ndërkombëtare, ligjeve, marrëveshjeve kolektive, rregulloreve e akteve tjera normative të njohura, si dhe programit e statutit të BSPK-së;
7. BSPK-ja në kushtet e reformave ekonomike, pra të një ekonomie të tregut, angazhohet për krijimin e një shoqërie pa korrupsion, pa privilegje dhe diskriminime, pa marrë parasysh përkatësinë kombëtare, racore, gjinore, sociale, bindjeve fetare, politike, etj.
8. BSPK-ja angazhohet për zhvillimin e gjithëmbarshëm ekonomik dhe shoqëror të Kosovës, duke zhvilluar dialogun social me partneret social, qeverinë, punëdhënësit, sindikatat kombëtare dhe ndërkombëtare si dhe organizmat e institucionet tjera legale dhe legjitime.

Neni 1

1. Emërtimi i plotë i Konfederatës është: “Bashkimi i Sindikatave të Pavaruar të Kosovës”;
2. Shkurtesa e saj është: “BSPK”;
3. Në komunikimin ndërkombëtar BSPK-ja shfrytëzon emërtimin në gjuhën angleze “The Union of Independent Unions of Kosovo”;
4. Selia e BSPK-së është në adresën: Rr. “Xhemal Hoxha”, Nr. 10, 10 000 Prishtinë, Kosovë.
5. BSPK-ja ka statusin e personit juridik, me status kushtetues ligjor të posaçëm (organizatë *Sui-generis*).

Neni 2

EMBLEMA, FLAMURI, VULA E RRUMBULLAKËT DHE VULA KATRORE

1. BSPK-ja ka emblemën e vet, në formë katërkëndëshi, me kombinim të ngjyrave: të verdhës, të kuqes dhe të zezës. Përmbi emblemën qëndron mbishkrimi me shkurtesën “BSPK”;
2. BSPK-ja ka flamurin e vet, i cili përmban emblemën me prapavijë të bardhë;
3. BSPK-ja ka vulën e rrumbullakët, me emërtimin e plotë dhe selinë;
4. Teksti në vulën e BSPK-së shkruhet në gjuhët zyrtare të Republikës së Kosovës si: Bashkimi i Sindikatave të pavarura të Kosovës, The Union of Independent Unions of Kosovo, (në mes) BSPK, Prishtinë;
5. BSPK-ja ka vulën në formë të katërkëndëshit me emërtimin e plotë të BSPK-së dhe selinë e saj e cila shërben për evidentimin e shkresave zyrtare;

6. Federatat sindikale, anëtare të BSPK-së, në shkresat zyrtare së bashku me emblemën e tyre mund t'a përdorin edhe emblemën e BSPK-së.

Neni 3

BSPK-ja ka xhirollogaritë e veta në bankat komerciale të licencuara të Republikës së Kosovës.

Neni 4

Qëllimet e BSPK-së

1. BSPK-ja ushtron veprimtarinë e saj për një shoqëri në të cilën të gjithë të punësuarit dhe qytetarët, do të gëzojnë të drejtën në punë, realizimin dhe mbrojtjen e interesave ekonomike, sociale, edukative dhe kulturore, e në veçanti:
 - a. Respektimin e të drejtave themelore të të punësuarve;
 - b. Zhvillimin e dialogut social në nivel vendi;
 - c. Hartimin, negocimin, nënshkrimin dhe implementimin e marrëveshjeve kolektive në nivel vendi;
 - d. Promovimin e politikave për krijimin e kushteve dinjitoze për punë, për të gjithë të punësuarit, anëtarë të federatave që funksionojnë në kuader të BSPK-së;
 - e. Angazhimin për zhvillimin e sistemit të përgjithshëm të sigurimit social në të cilin do të kenë qasje të gjithë të punësuarit;
 - f. Angazhimin për eliminimin e çdo lloj diskriminimi nga marrëdhënia e punës;
 - g. Sigurimin dhe angazhimin për krijimin dhe zbatimin e një legjislacioni demokratik bashkëkohor që sanksionon dhe mbron të drejtat e punëtorëve duke bërë propozime konkrete pranë organeve ligjdhënëse;
 - h. Rregullimin e raporteve ndërsindikale, si dhe zgjidhjen e konflikteve eventuale me qëllim të forcimit të unitetit dhe fuqisë sindikale;
 - i. Bashkëpunimin reciprok me Qeverinë e Republikës së Kosovës dhe organizatat e punëdhënësve në kuadër të partneritetit në nivel vendi.
 - j. Mbrojtja e së drejtës për zgjedhje të lirë të profesionit, vendit të punës, ngritjes së nivelit arsimor dhe kualifikimit profesional sipas vendit të punës;
 - k. Mbrojtja e anëtarëve nga veprimet burokratike, arbitrare apo largimet-përbashkëtimet, padrejtësia në punë nga ana e punëdhënësit;
 - l. Bënë presion për punësimin e punëtorëve të papunë si dhe të atyre që për shkaqe ekonomike mbesin të papunë dhe kërkojnë zgjedhjen e statusit të tyre;
 - m. Solidarizohet me sindikatat vendore dhe ndërkombëtare etj.

Neni 5

Përgjegjësitë e BSPK-së

BSPK-ja është përgjegjëse për:

1. Përfaqësimin e interesave të përbashkëta të anëtarësisë së federatave anëtare të saj;
2. Udhëheqjen e dialogut social në nivel vendi;
3. Promovimin e sindikalizmit si formë e organizimit të lirë të të punësuarve, për mbrojtjen e të drejtave dhe interesave të tyre;
4. Koordinimin e federatave sindikale lidhur me çështjet e përbashkëta;

5. Ofrimin e mbështetjes për federatat sindikale të saj;
6. Përfaqësimin e federatave/sindikatave në negociata dhe diskutime me të gjitha organet dhe institucionet relevante të interesit;
7. Përfaqësimin në organizatat ndërkombëtare në të cilat BSPK-ja është e anëtarësuar dhe ku mund t'i shpreh qëndrimet e veta, si dhe t'i mbrojë interesat e anëtarësisë së saj.

Neni 6

STATUTI

1. Statuti është normativi më i lartë ligjor i brendshëm i BSPK-së.
2. Statuti i BSPK-së miratohet, ndryshohet dhe plotësohet nga Kongresi me shumicë votash të të gjithë delegatëve (50%+1).
3. Iniciativën për ndryshim apo plotësim të statutit mund ta iniciojë Kryetari i BSPK-së, Këshilli Drejtues dhe Kryesia e BSPK-së, Komisioni Statutar ose të paktën një e treta e delegatëve të Kongresit.
4. Këshilli Drejtues cakton një afat kohor për propozimet, për ndryshimet në nenet e statutit.
5. Pavarësisht nga paragrafi i dytë i këtij neni, ndryshimet në statut, që nuk prekin organizimin e brendshëm të BSPK-së dhe kur gjykohet e nevojshme për funksionimin më të mirë të BSPK-së, mund t'i bëjë Këshilli Drejtues me një shumicë prej dy të tretave të të gjithë anëtarëve të Këshillit Drejtues dhe me pëlqimin e Komisionit Statutar.

Neni 7

Format e veprimit dhe presionit sindikal

Për realizimin e qëllimeve të veta BSPK-ja përdor të gjitha format ligjore të veprimit sindikal si:

1. Dialogimin me partnerët social;
2. Hartimin, negocimin dhe nënshkrimin e marrëveshjes kolektive në nivel vendi;
3. Informimin e drejtë dhe të vazhdueshëm për të gjithë të punësuarit;
4. Ndërmerr aktivitete adekuate solidare, në pajtim me programin dhe statutin e vet;
5. Protesta;
6. Greva;
7. Greva është mjete i fundit i presionit sindikal dhe organizohet kur dështojnë të gjitha përpjekjet për zgjidhjen e konfliktit me mjete tjera ligjore;
8. I gjithë organizimi dhe rrjedha e grevës bëhet sipas Ligjit mbi Grevat i Republikës së Kosovës.
9. Në të gjitha rastet duhet të jepet pëlqimi nga organi përkatës dhe të njoftohet kryesia e BSPK-së, gjegjësisht KD-ja e BSPK-së, përveç në rast të ndonjë greve në federata sindikale të cilat marrin vendime brenda organeve të veta.
10. Vendimin për hedhje në grevë në nivel vendi e merr Këshilli Drejtues me shumicë votash, nëse për këtë paraprakisht kanë dhënë pëlqimin 2/3 e federates anëtare të BSPK-së.

Neni 7

Informimi

1. BSPK-ja informon anëtarësinë dhe opinionin mbi veprimtarinë e saj nëpërmjet mjeteve të informimit, botimeve të veta, tubimeve, konferencave për shtyp, nëpërmjet të

përfaqësueseve të zgjedhur, web faqës, broshurave dhe formave tjera të përshtatshme të informimit;

2. Nuk lejohet censurimi i informimit nga asnjë organ i BSPK-së;
3. Informimi duhet të jete objektiv, real dhe në interes të BSPK-së;
4. BSPK-ja përmes zyrës për informim dhe organeve të saj, është e obliguar rregullisht ta informojë opinionin publik dhe anëtarësinë sindikaliste për punën dhe veprimtarinë e organeve të BSPK-së;
5. Federatat sindikale kanë mundësi që informimin e anëtarësisë dhe opinionit ta bëjnë nëpërmjet formave të informimit publik dhe nëpërmjet organeve të BSPK-së;
6. Për botimet e BSPK-së vendos Kryetari i BSPK-së;
7. BSPK-ja mund të formojë zyra pune aty ku e shoh të arsyeshme dhe të nevojshme.

Neni 8 **Anëtarësia**

1. BSPK-ja është organizim sindikal në nivel konfederate, që përfaqëson organizimet sindikale në nivel vendi;
2. Anëtarë të BSPK-së janë federatat sindikale, të cilat përfaqësojnë punëtorët në bazë të sektorit dhe profesionit të caktuar;
3. Një organizatë sindikale në nivel të federatës sindikale, mund të jetë anëtare e BSPK-së vetëm me përmbushjen e kriterëve të statutit të BSPK-së dhe që është e regjistruar në ministrinë përkatëse për regjistrim të organizatave sindikale si federatë sindikale;
4. Anëtarësimi në BSPK bëhet sipas vullnetit të lirë të federatave sindikale, duke respektuar vendimet e organeve përfaqësuese të tyre.

Neni 9 **Kushtet e anëtarësimit në BSPK**

Për tu anëtarësuar në BSPK, federatat sindikale duhet t'i plotësojnë këto kushte:

1. Vendimin e organit më të lartë vendimmarrës;
2. Statutin e federatës sindikale, i cili duhet të jetë i harmonizuar me dispozitat e statutit të BSPK-së;
3. Numri i anëtarëve të federatës sindikale duhet të jetë së paku (pesëqind) 500 sipas deklaratave të plotësuara për anëtarësim dhe dëshmitë për pagesën e kuotës;
4. Pranimi i federatave sindikale në BSPK bëhet me përmbushjen e kriterëve nga paragrafët 1, 2, dhe 3 të këtij neni. Konstatimin për përmbushjen e këtyre kriterëve e bënë Kryesia Ekzekutive, ndërsa vendimin e merr Këshilli Drejtues i BSPK-së;
5. Pala e pakënaqur mund të parashtrijë ankesë pranë Komisionit për Zgjedhjen e Kontesteve dhe Ankesave, brenda afatit prej 15 (pesëmbëdhjetë) ditësh nga dita e dorëzimit të vendimit;
6. Pala e pakënaqur me vendimin e Komisionit për Zgjedhjen e Kontesteve dhe Ankesave, mund të parashtrijë ankesë pranë Këshillit Drejtues, si organ i shkallës së dytë, në afatin prej 15 (pesëmbëdhjetë) ditësh nga dita e dorëzimit të vendimit.

Neni 10

Të drejtat dhe obligimet e Federatave të BSPK-së

1. Të drejtat e federatave sindikale anëtare të BSPK-së janë:
 - a. Të përfaqësohen në të gjitha organet e BSPK-së, sipas kritereve të parapara me këtë statut në bazë të numrit të anëtarësisë;
 - b. Të iniciojnë veprime sindikale sipas procedurave të parapara me statut;
 - c. Të mbrojnë autonominë e tyre në përputhje me dispozitat e këtij statuti;
 - d. Të drejtën e ndihmës profesionale nga BSPK-ja;
2. Federatat sindikale anëtare të BSPK-së, kanë këto obligime:
 - a. Të paguajnë rregullisht kuotën e anëtarësisë sindikale për BSPK- në, lartësinë prej 1(një) Euro në vit për secilin të anëtarësuar;
 - b. Shlyerja e të gjitha borxheve financiare ndaj BSPK-së, duhet të bëhet deri me 31 mars të çdo viti, përveç nëse Kryetari i BSPK-së nxjerr vendim të veçantë për t'ua mundësuar pagesën në dy apo tri rata;
 - c. Të zbatojnë vendimet e organeve të BSPK-së;
 - d. Në rast të paraqitjes së nevojës, Këshilli Drejtues i BSPK-së ka të drejtë të caktoj ndonjë kuotë shtesë për t'u paguar nga federatat sindikale anëtare të BSPK-së me kushte që votimi të jetë unanim.

Neni 11

Largimi i Federatave/Sindikatave nga BSPK-ja

1. Federatat sindikale humbin statusin e anëtarit të BSPK-së, për këto arsye:
 - a. Në rast të shkeljes së parimeve themelore të këtij statuti;
 - b. Anëtarësimi i dyfishtë edhe në ndonjë konfederatë tjetër në nivel vendi;
1. Për mospagesën e kuotës së anëtarësisë ashtu siç e parasheh neni 10, paragrafi b;
2. Detyrimet që rrjedhin nga dispozitat e këtij statuti nuk do të pushojnë, derisa të përfundojë procedura sipas nenit 10, paragrafi 2, pikat b, c dhe d;
3. Propozimin për heqjen e të drejtës së anëtarit të BSPK-së e jep Kryesia Ekzekutive, ndërsa vendimin e merr Këshilli Drejtues i BSPK-së, përveç rastit të mospagesës së antarësisë e cila me automatizem e humb të drejtën e të qenurit antare e BSPK..

Neni 12

Organizimi regjional i BSPK-së

1. Këshilli Drejtues formon zyret regjionale varësisht me nevojat, mundësitë dhe interesat e anëtarësisë sindikale.
2. Puna e zyrave regjionale do të rregullohet me akt të veçantë juridik, të cilin e nxjerrë Këshilli Drejtues i BSPK-së.
3. Zyret regjionale shtrihen në tërë territorin e Republikës së Kosovës.
4. Koordinatori i zyrave regjionale emërohet nga Kryetari i BSPK-së, me propozimin paraprak nga federatat sindikale të regjionit përkatës.
5. Shkarkimi i koordinatorit të zyrave regjionale bëhet nga Kryetari i BSPK-së.

Neni 13

Rrjeti i Gruas i BSPK-së

1. *Rrjeti Gruas* i BSPK-së është strukturë organizative e BSPK-së;
2. *Rrjeti i Gruas* është bartëse e projekteve me rëndësi të veçantë gjinore dhe përbëhet nga delegatet të cilat përfaqësojnë anëtarët e federatave/sindikatave;
3. Zgjedhja e delegatëve dhe funksioni i *Rrjetit të Gruas* bëhet sipas mënyrës së përcaktuar me rregulloren e punës së rrjetit të gruas;
4. Kriteret për përfaqësim në Kuvendin e *Rrjetit të Gruas* i cakton Këshilli Drejtues i BSPK-së në bazë të numrit të anëtarëve të federatës;
5. Kryetarja e *Rrjetit të Gruas*, në bazë të funksionit është anëtare me të drejta të plota në kongres, Këshillin Drejtues me dy përfaqësuese dhe në Kryesinë Ekzekutive të BSPK-së;
6. Me qëllim të realizimit të objektivave të veta dhe funksionimit të tij, *Rrjeti i Gruas* do të gëzojë mjete financiare, e cila do të rregullohet me aktin juridik mbi menaxhimin e financave të BSPK-së.

14

Rrjeti i të Rinjve i BSPK-së

1. *Rrjeti i të Rinjve* është strukturë organizative e BSPK-së;
2. *Rrjeti i të rinjve* të BSPK-së është kompetent për përfaqësimin e anëtarëve të moshës rinore të BSPK-së, deri në moshën 35 vjeçare;
3. *Rrjeti i të rinjve* është bartës i projekteve me rëndësi të veçantë për të rinjtë, me qëllim të promovimit të rinisë në shoqëri;
4. *Rrjeti i të rinjve* përbëhet nga delegatët të cilët përfaqësojnë anëtarët e federatave sindikale;
5. Kriteret për përfaqësim në Kuvendin e *Rrjetit të të Rinjve* i cakton Këshilli Drejtues i BSPK-së në bazë të numrit të anëtarëve të federatës;
6. Zgjedhja e delegatëve dhe funksioni i *Rrjetit të të Rinjve* bëhet sipas mënyrës së përcaktuar me Rregulloren e Punës së Rrjetit të të Rinjve;
7. Kryetari/ja e *Rrjetit të të Rinjve*, në bazë të funksionit është anëtar me të drejta të plota në Kongres, Këshill Drejtues me një përfaqësues dhe në Kryesinë Ekzekutive të BSPK-së;
8. Nga niveli i bazës e deri në piramidë, 30% e të zgjedhurve duhet të jenë të gjinisë femërore;
9. Me qëllim të realizimit të objektivave të veta dhe funksionimit të tij, *Rrjeti i të Rinjve* do të gëzojë mjete financiare, e cila do të rregullohet me aktin juridik mbi menaxhimin e financave të BSPK-së.

Neni 15

Organet e BSPK-së

1. Organet e BSPK-së janë:
 - a. Kongresi i BSPK-së;
 - b. Kryetari i BSPK-së;
 - c. Këshilli Drejtues i BSPK-së;
 - d. Kryesia Ekzekutive e BSPK-së;
 - e. Komisioni Mbikëqyrës i BSPK-së;

- f. Komisioni Statutar i BSPK-së.
2. Organet e BSPK-së zgjedhën në mënyrë demokratike nga poshtë lart, japin llogari para zgjedhësve të tyre dhe janë të revokueshëm nga ata.

Neni 16

Kongresi i BSPK-së

1. Kongresi është organi më i lartë i BSPK-së;
2. Kongresi i rregullt mblidhet një herë në 4 (katër) vite;
3. Vendimin për thirrjen e Kongresit e merr Këshilli Drejtues me shumicë votash, së paku dy muaj para mbajtjes së tij. Kongresi në kushte të jashtëzakonshme mund të mbahet edhe online ose me email.
4. Kongresi zhvillon punimet nëse janë të pranishëm 2/3 nga numri i përgjithshëm i delegatëve;
5. Statusin e delegatit në Kongresin e BSPK-së sipas funksionit e kanë anëtarët e Kryesisë Ekzekutive të BSPK-së, Koordinatorët e Zyrave Regjionale të BSPK-së, Kryetari i Komisionit Statutar, Kryetari i Komisionit mbikëqyrës, Kryetarja e Rrjetit të Gruas dhe Kryetari/ja i/e Rrjetit të Rinjve;
6. Statusin e delegatit në Kongresin e BSPK-së e kanë përfaqësuesit e federatave sindikale, të zgjedhur në organin vendimmarrës përkatës të tyre, sipas çelësit si në vijim:-në çdo 300 (treqind) anëtarë plus një delegat;
7. Federatat sindikale të cilat kanë mbi 25.000 (njëzetepesëmijë) anëtarë nuk mund të kenë më shumë se 49% të përfaqësuesve të përgjithshëm.
8. Mandati i delegatit është katër vjeçar;
9. Së paku çdo i treti delegat duhet të jetë i gjinisë femërore;
10. Kongresi i jashtëzakonshëm, nëse është e nevojshme, mund të mbahet më parë, me kërkesën e 1/3 të delegatëve të Kongresit, me vendim të Këshillit Drejtues, me vendim të Kryesisë ose Kryetarit të BSPK-së;
11. Vendimet në Kongres merren me shumicë të thjeshtë votash nga delegatët e pranishëm, ndërsa për formën e votimit vendoset në Kongres;
12. Para çdo votimi, Kryesia e Punës së Kongresit duhet të konstatojë kuorumin, ku për vendimmarrje nevojiten 50%+1 i delegatëve të pranishëm, nga numri i përgjithshëm i delegatëve të Kongresit, sipas paragrafit 4 të këtij neni.
13. Kryesinë e Punës të Kongresit Zgjedhor, në fazën e zgjedhjeve, nuk mund ta udhëheq ai që është kandidat për t'u zgjedhur në ndonjë post në organet e BSPK.

Neni 17

Detyrat e Kongresit të BSPK-së

Detyrat e Kongresit janë:

1. Përcakton drejtimit kryesore të politikës sindikale dhe programin e BSPK-së për periudhën e ardhshme 4 (katër) vjeçare;
2. Miraton rezoluta për çështje të veçanta të lëvizjes sindikale;
3. Miraton statutin e BSPK-së, me ndryshimet dhe plotësimet e tij;
4. Miraton Rregulloren e Punës së Kongresit;
5. Shqyrton dhe miraton raportet e trupave punuese të BSPK-së, në mes të dy Kongreseve;

6. Zgjedhë dhe shkarkon Kryetarin e BSPK-së me 50%+1 të votave të delegatëve të pranishëm;
7. Zgjedhë dhe shkarkon, anëtarët e Komisionit Mbikëqyrës dhe anëtarët e Komisionit Statusor me 50%+1 të votave të delegatëve prezentë, me një konkurrencë të mbi 5 kandidatëve, 5 më të votuarit do të jenë pjesë e komisioneve ndërsa të tjerët mbesin rezervë për nderime eventuale;
8. Miraton raportin e punës dhe atë financiar të BSPK-së mes dy Kongreseve;
9. Diskuton dhe miraton raportin e Komisionit Mbikëqyrës;
10. Shqyrton ankesat dhe parashtrirat që i janë drejtuar Kongresit;
11. Mund të ndryshojë /anulojë ndonjë akt normativ apo vendim të organeve të BSPK-së;
12. Zgjedh kryesinë e punës së Kongresit;
13. Zgjedh komisionet verifikuese të Kongresit;
14. Zgjedh komisionin kandidues të Kongresit;
15. Zgjedh komisionin zgjedhor të Kongresit;
16. Zgjedh edhe komisionet tjera të nevojshme për punën e Kongresit;
17. Verifikon anëtarët e Këshillit Drejtues sipas propozimit të federatave sindikale;
18. Kongresi për funksionimin më efikas të BSPK-së mund të transferojë tek Këshilli Drejtues i BSPK-së disa kompetenca brenda fushëveprimit të Kongresit.
19. U jep mirënjohje anëtarëve të BSPK-së.

Neni 18

Kongresi i Jashtëzakonshëm

Të drejtën për thirrjen e Kongresit të Jashtëzakonshëm e kanë:

1. Kryetari i BSPK-së;
2. Këshilli Drejtues mund të vendosë thirrjen e Kongresit të Jashtëzakonshëm me kërkesën dhe nënshkrimin e 2/3 nga numri i përgjithshëm i anëtarëve;
3. Këshilli Drejtues duhet të përgatisë dokumentet e nevojshme për mbajtjen e Kongresit të Jashtëzakonshëm;
4. Kongresi i Jashtëzakonshëm thirret së paku një muaj para mbajtjes së tij.

Neni 19

Mbledhjet konstitutive të të gjitha organeve të BSPK-së

1. Brenda periudhës 45 ditëshe nga dita e mbajtjes së Kongresit, duhet të mbahen të gjitha mbledhjet konstitutive të të gjitha organeve të BSPK-së;
2. Të gjithë kandidatët për pozitat në organet e BSPK-së duhet të jenë jopartiak;
3. Të gjithë kandidatët për pozita në organet e BSPK-së duhet të kenë përgatitje profesionale universitare, përvojë të dëshmuar, punë në aktivitete sindikale dhe pëlqimin (letër rekomandimin) nga organet udhëheqëse të sindikatave prej nga vijnë.

Neni 20

Kryetari i BSPK-së

1. Kryetari është organi i BSPK-së, i cili paraqet unitetin dhe bashkëveprimin institucional të anëtarëve të BSPK-së;

2. Kryetari i BSPK-së zgjidhet me shumicën (50%+1) e delegatëve të pranishëm të Kongresit të BSPK-së;
3. Kryetari i BSPK-së mund të shkarkohet nga funksioni, nga delegatët e Kongresit të BSPK-së edhe para skadimit të mandatit, në rastet e shkeljes së dispozitave të këtij statuti, nëse nuk arrin të marr vetëbesimin e 50% +1 të delegatëve të pranishëm;
4. Kryetari është funksionari më i lartë në BSPK dhe udhëheq me punën e Kryesisë Ekzekutive të BSPK-së;
5. Mandati i Kryetarit të BSPK-së është 4 (katër) vjeçar, me të drejtë rizgjedhje;
6. Kandidati për Kryetar të BSPK-së, duhet të ketë mbështetjen e federatës/sindikatës reprezentuese si dhe mbështetjen e një (1) Federatave sindikale anëtare të BSPK-së;
7. Kandidati që paraqet kandidaturën për Kryetar të BSPK-së, nuk mund të kandidojë në funksione tjera udhëheqëse të BSPK-së;
8. Kandidati për Kryetar të BSPK-së, krahas kandidimit duhet të paraqes vizionin dhe programin e tij për BSPK-në në periudhën e ardhshme katër vjeçare;
9. Në rast të vdekjes, pamundësisë së ushtrimit të postit apo në rrethana të jashtëzakonshme, Kryetarin e BSPK-së do ta zëvendësojë njëri nga Nënkryetarët e BSPK-së, në pajtim me nenin 22, paragrafi 4 i këtij Statuti.

Neni 21

Detyrat e Kryetarit të BSPK-së

1. Përfaqëson dhe vepron në emër të BSPK-së brenda dhe jashtë vendit;
2. Thërret dhe i udhëheqë mbledhjet e Kryesisë Ekzekutive, si dhe mbledhjet e Kongresit të BSPK-së deri në zgjedhjen e Kryesisë së Punës;
3. Për punën nga kompetenca e tij i përgjigjet Kongresit;
4. Vendos për numrin e Nënkryetarëve që do të ketë BSPK-ja;
5. Propozon zgjedhjen dhe shkarkimin e Nënkryetarit/ve të BSPK-së, për një periudhë 4 (katër) vjeçare me të drejtë rizgjedhjeje;
6. Së paku njëri nga Nënkryetarët (nëse janë dy) duhet të jetë i gjinisë femërore nëse Kryetari është i gjinisë mashkullore;
7. Koordinon punët e organeve të BSPK-së që bien nën kompetencën e tij;
8. Informon opinionin publik për veprimtarinë e BSPK-së;
9. Nënshkruan akte të ndryshme juridike në emër të BSPK-së;
10. Nënshkruan transaksione financiare në pajtim me linjat buxhetore të BSPK-së;
11. Merr vendime për çështjet urgjente të cilat nuk presin dhe për të njëjtat informon Kryesinë Ekzekutive në mbledhjen e radhës;
12. Udhëheq bashkëpunimin sindikal ndërkombëtar;
13. Është përgjegjës i fondeve në llogaritë të BSPK-së;
14. Kujdeset për zbatimin e detyrave që dalin nga organet e BSPK-së;
15. Angazhon Këshilltarë Profesional për nevoja të tij dhe të BSPK-së;
16. Emëron komisione të ndryshme për punën në BSPK dhe për përfaqësim në KES;
17. Propozon anëtarët e KES-it nga BSPK-ja;
18. Informon Kryesinë Ekzekutive lidhur me vizitat dhe përfaqësimet e BSPK-së brenda dhe jashtë vendit,
19. Zbaton vendimet e organeve të BSPK-së nga kompetenca e tij;

20. Lidhë kontrata nga marrëdhënia e punës me të punësuarit në shërbimin profesional të BSPK-së në bazë të autorizimit personal;
21. Cakton personat përgjegjës për mbikëqyrje të zbatimit të kontratave të lidhura nga BSPK-ja;
22. Kryen punë ditore me interes për BSPK-në;
23. Kryen punë të tjera për të cilat ngarkohet nga Kongresi i BSPK-së;
24. I raporton Kryesisë Ekzekutive dhe Këshillit Drejtues dhe i përgjigjet Kongresit të BSPK-së;
25. Cakton personin përgjegjës për informim.

Neni 22

Nënkryetarët e BSPK-së

1. Nënkryetarët e BSPK-së, me propozimin e Kryetarit të BSPK-së, zgjidhen dhe shkarkohen nga Këshilli Drejtues;
2. Nënkryetarët e BSPK-së zgjidhen për një periudhë katër (4) vjeçare, me të drejtë rizgjedhjeje;
3. Se paku njëri nga Nënkryetarët duhet të jetë i gjinisë femërore, nëse janë dy Nënkryetar;
4. Nënkryetarët mund të shkarkohen edhe para skadimit të mandatit,
5. Kandidatët për Nënkryetar të BSPK-së, preferohet të kenë mbështetjen e federatës sindikale së vet reprezentative;
6. I ndihmojnë Kryetarit të BSPK-së në punët e përditshme dhe detyrat që ai i angazhon;
7. Për punën e vet i raporton Kryetarit të BSPK-së dhe Kryesisë Ekzekutive,.

Neni 23

Këshilli Drejtues i BSPK-së

1. Këshilli Drejtues i BSPK-së është organi më i lartë në mes dy Kongreseve;
2. Këshilli Drejtues thirret së paku dy herë në vit;
3. Këshillin Drejtues e përbëjnë:
 - a. Kryetari dhe Nënkryetarët e BSPK-së;
 - b. Kryetari dhe Nënkryetarët e Këshillit Drejtues të BSPK-së;
 - c. Kryetarët e federatave sindikale anëtare të BSPK-së;
 - d. Kryetarja e "Rrjeti i Gruas" dhe dy përfaqësuese;
 - e. Kryetari-ja i "Rrjetit të Rinjve" të BSPK-së dhe një përfaqësues;
 - f. Koordinatorët e Zyrave Regjionale të BSPK-së;
 - g. Në çdo 1000 (një mijë) anëtarë, federatat sindikale përfaqësohen edhe me nga një anëtar, me ç'rast së paku çdo i treti përfaqësues i zgjedhur duhet të jetë femër;
4. Këshilli Drejtues i BSPK-së në mbledhjen e vet konstituive zgjedhë Kryetarin dhe Nënkryetarët e Këshillit Drejtues;
5. Të propozuarit për Kryetarë, Nënkryetarë të Këshillit Drejtues duhet të kenë përgatitje profesionale universitare dhe përvojë të dëshmuar, punë në aktivitete sindikale në sindikatat prej nga propozohen;
6. Këshilli Drejtues mund të thirret edhe me kërkesën e 1/3 të anëtarëve të Këshilli Drejtues apo me kërkesën e Komisionit Mbikëqyrës;

7. Këshilli Drejtues ka kuorum nëse janë prezent 50%+1 e numrit të përgjithshëm të anëtarëve;
8. Këshilli Drejtues merr vendime, me votimin e shumicës së anëtarëve të pranishëm;
9. Këshilli Drejtues ka kompetencën e menaxhimit dhe planifikimit të mjeteve financiare si dhe të pasurisë së luajtshme dhe të paluajtshme të BSPK-së;
10. Këshilli Drejtues thirret me kërkesën e Kryetarit të BSPK-së në konsultim me Kryetarin e Këshillit Drejtues;
11. Deri në zgjedhjen e Kryetarit të Këshillit Drejtues, mbledhjen e drejton Kryetari i BSPK-së.
12. Këshilli Drejtues i BSPK-së zgjedhë Nënkryetarin/ët e BSPK-së të propozuar nga Kryetari i BSPK-së.

Neni 24

Kryetari i Këshillit Drejtues të BSPK-së

Kryetari i Këshillit Drejtues të BSPK-së ka këto kompetenca dhe detyrime:

1. Thërret mbledhjet e rregullta të Këshillit Drejtues në konsultim me Kryetarin e BSPK-së, në pajtim me dispozitat e këtij Statuti;
2. Udhëheq mbledhjet e Këshillit Drejtues dhe kujdeset për mbarëvajtjen e tyre;
3. Thërret mbledhjet e jashtëzakonshme të Këshillit Drejtues, në të gjitha rastet kur përmbushen kushtet e parapara me nenin 23 të Statutit të BSPK-së;
4. Kujdeset për zbatim të drejtë të Rregullores së Punës të Këshillit Drejtues të BSPK-së.
5. Puna e kryetarit të KD-së është punë vullnetare pa pagesë.

Neni 25

Kompetencat e Këshillit Drejtues të BSPK-së

1. Zbaton vendimet e Kongresit;
2. Organizon dhe drejton veprimtarinë sindikale të BSPK-së;
3. Në rastet kur pozita e Kryetarit të BSPK-së, për arsye të ndryshme mbetet vakante.
4. Këshilli Drejtues me votimin e 2/3 nga numri i delegatëve të pranishëm, mundet që njërin Nënkryetar ta emërojë si ushtrues të detyrës së Kryetarit të BSPK-së deri në Kongresin e radhës, më së largu për një periudhë kohore prej 3 muajsh;
5. Miraton buxhetin vjetor të BSPK-së, konform kërkesave për vitin e ri kalendarik,
6. Shqyrton dhe miraton planin dhe Raportin e Punës të BSPK-së;
7. Shqyrton dhe miraton Raportin Financiar të BSPK-së;
8. Vendos për thirrjen e Kongresit dhe kryen punët përgatitore;
9. Vendos dhe shpallë zgjedhjet në të gjitha strukturat dhe nivelet e BSPK-së;
10. Zgjedhë dhe shkarkon anëtarët e Komisionit për Zgjidhjen e Kontesteve dhe Ankesave të BSPK-së;
11. Zgjedhë dhe shkarkon anëtarët e Komisionit Disiplinor të BSPK-së;
12. Shqyrton dhe miraton raportet e punës së organeve të cilat i zgjedhë apo i legjitimon;
13. Vendos mbi nënshkrimin e Marrëveshjeve Sociale, Marrëveshjes Kolektive dhe deklaratave në përputhshmëri me aktet ligjore;
14. Vlerëson, shqyrton dhe merr qëndrim lidhur me vendimet e Kryesisë së SPDK-së;
15. Verifikon propozimin e Kryesisë për Komisionin Mbikëqyrës dhe Komisionin Statutar;
16. Propozon kandidatët për organet punuese të Kongresit;

17. I informon federatat sindikale në lidhje me vendimet dhe veprimet e Këshillit Drejtues;
18. Merr masa (rregullisht dhe tërësisht) për anëtarësim e federatave sindikale në BSPK, për pagesën e kuotës sindikale si dhe për sigurimin dhe mbarëvajtjen e fondeve;
19. Organizon veprime të përbashkëta të solidaritetit që adresojnë çështjet sociale të punonjësve;
20. Organizon forma të ndryshme të veprimit sindikal për të drejtat e anëtarëve të konfederatës të garantuara me marrëveshjen kolektive, me kushtetutë dhe konventa ndërkombëtare;
21. Vendos në shkallë të dytë sipas procedurës me ankesë për pranimin dhe largimin sindikatave të pavarura në BSPK;
22. Miraton edhe vendime të tjera në interes për BSPK-në;
23. Vendosë për grevën si formë e presionit sindikal;
24. Miraton Rregulloren e Punës së Këshillit Drejtues.

Neni 26

Këshilli Drejtues i Jashtëzakonshëm

1. Këshilli Drejtues i Jashtëzakonshëm thirret me kërkesën e Kryetarit të BSPK-së;
2. Këshilli Drejtues i Jashtëzakonshëm thirret me kërkesën e 2/3 e anëtarëve të Kryesisë Ekzekutive të BSPK-së;
3. Këshilli Drejtues i Jashtëzakonshëm thirret me kërkesën e 1/3 te anëtarëve të Këshillit Drejtues.

Neni 27

Kryesia Ekzekutive e BSPK-së

1. Kryesia e BSPK-së është organ ekzekutiv i BSPK-së;
2. Anëtarë të Kryesisë së BSPK-së janë:
 - a. Kryetari i BSPK-së;
 - b. Nënkryetari/ët e BSPK-së;
 - c. Kryetarët e federatave sindikale anëtare të BSPK-së;
 - d. Kryetari i Këshillit Drejtues,
 - e. Kryetarja e *Rrjetit të Gruas* së BSPK-së;
 - f. Kryetari-ja e *Rrjetit të Rinjve* të BSPK-së;
 - g. Federatat sindikale që kanë numër më të madh të anëtarëve përfaqësohen në Kryesinë Ekzekutive edhe me anëtarë tjerë në këtë mënyrë:
Në çdo 5000 anëtarë edhe një anëtarë shtesë në Kryesinë Ekzekutive;
 - h. Anëtarë shtesë në Kryesinë Ekzekutive nga Federata së paku gjysma e tyre duhet të jenë të gjinisë femërore;
3. Mbledhjet e Kryesisë Ekzekutive mbahen sipas nevojës së paraqitur në BSPK, por të paktën një herë në muaj;
4. Mbledhja e Kryesisë Ekzekutive thirret me iniciativën e Kryetarit të BSPK-së, apo me kërkesën 1/3 të anëtarëve të saj, në afatin prej 15 ditësh nga dita e paraqitjes së kërkesës;
5. Mbledhjet e Kryesisë Ekzekutive i udhëheqë Kryetari i BSPK-së;
6. Mbledhja e Kryesisë Ekzekutive mund të mbahet edhe online.

A.H

Neni 28

Detyrat e Kryesisë Ekzekutive të BSPK-së

1. Zbaton vendimet e Këshillit Drejtues të BSPK-së;
2. Monitoron dhe vlerëson zbatimin e marrëveshjeve shoqërore, Marrëveshjes Kolektive, ligjeve dhe akteve të tjera ligjore;
3. Miraton rregulloren për sistematizimin e vendeve të punës në BSPK të propozuara nga Kryetari i BSPK-së;
4. Emëron dhe shkarkon grupe punuese për të negociuar dhe lidhur marrëveshje kolektive dhe ua jep atyre udhëzimet e duhura për negociatat;
5. Shqyrton dhe merr vendime lidhur me iniciativat dhe propozimet e federatave/sindikatave;
6. Emëron përfaqësuesit e BSPK-së në organe dhe organizata të tjera;
7. Jep opinionin mbi ligjet, rregulloret dhe dokumentet e tjera;
8. Përcjellë ecurinë e buxhetit dhe zbatimin e planit ekonomik dhe financiar;
9. Vendos për transaksione financiare në pajtim me linjat buxhetore të BSPK-së;
10. Harton planin financiar për periudhën vijuese;
11. Vendosë për krijimin e fondeve të caktuara;
12. Koordinon veprimet sindikale në të gjitha nivelet e organizimit sindikal;
13. Sipas nevojës formon trupa punuese;
14. Për punën e vet Kryesia Ekzekutive i përgjigjet dhe i raporton Këshillit Drejtues;
15. Nxjerrë vendime me interes për BSPK-në;
16. Merr vendim për angazhimin e ndonjë eksperti nga fusha të caktuara;
17. Mbikëqyrë Shërbimin Profesional të BSPK-së;
18. Vendosë për publikimet e BSPK-së;
19. Sipas nevojës formon trupa punuese;
20. Miraton Rregulloren e Punës së Kryesisë Ekzekutive të BSPK-së;
21. Kryen edhe punë tjera të cilat ia deleton Këshilli Drejtues.

Neni 29

Komisioni Mbikëqyrës i BSPK-së

1. Komisioni Mbikëqyrës i BSPK-së përbëhet prej pesë (5) anëtarëve;
2. Kryetari i Komisionit duhet të jetë me përgatitje adekuate profesionale, nga lëmia përkatëse dhe së paku dy nga anëtarët duhet të jenë të gjinisë femërore;
3. Anëtarët e komisionit mbikëqyrës zgjidhen me vota të fshehura, më së paku nga një kundërkandidat dhe ata që mbesin në vota më pak mbesin në listën rezervë;
4. Komisioni zgjedhë Kryetarin, nga radhët e anëtarëve të tij;
5. Komisioni i zhvillon mbledhjet nëse janë të pranishëm shumica e anëtarëve;
6. Komisioni është i obliguar që të mbledhet të paktën një herë në vit, për të kontrolluar të hyrat dhe të dalat e mjeteve financiare në BSPK-së;
7. Anëtari i Komisionit i cili mungon në mbledhje pa arsye të justifikueshme me propozimin e Kryetarit të komisionit mund të zëvendësohet nga Kryetari i BSPK-së me anëtarin nga lista rezervë.

Neni 30

Detyrat e Komisionit Mbikëqyrës të BSPK-së

1. Komisioni përcjell zbatimin e politikave të definuara financiare në BSPK;
2. Bënë kontrollimin e dokumentacionit financiar të BSPK-së;
3. Kontrollon librat e kontabilitetit të BSPK-së, së paku një herë në vit apo me kërkesë të Kryesisë së BSPK-së edhe më shumë se një herë në vit;
4. Komisioni vepron në mënyrë te pavarur;
5. Shërbimi Profesional i BSPK-së është i obliguar ta prezantojë dokumentacionin e kërkuar Komisionit në formën të cilën ai kërkon;
6. Komisioni jep sugjerime për çështje të caktuara në përputhje me rregullat e kontabilitetit dhe ligjet në fuqi;
7. Për punën e vet i raporton Këshillit Drejtues në formë të shkruar, të paktën një herë në vit;
8. Komisioni vendosë me shumicën e votave dhe punon në bazë të rregullores së punës;
9. Komisioni mbikëqyrës bëjnë pranim-dorëzimin e mandatit të Kryetarit dhe dokumentacionin e plotë të BSPK-së, më së largu tri ditë nga zgjedhja e kryetarit të ri të BSPK-së, për këtë edhe mban procesverbal.

Neni 31

Komisioni Statutar i BSPK-së

1. Komisioni Statutar përbëhet prej pesë (5) anëtarëve;
2. Kryetari i komisionit statutar duhet ta kenë përgatitjen adekuate profesionale, nga fusha përkatëse dhe së paku njëri nga anëtarët duhet të jetë femër;
3. Anëtarët e komisionit statutar zgjidhen me vota të fshehura më së paku nga një kundërkandidat dhe ata që mbesin në vota më pak mbesin në listën rezervë;
4. Anëtarët e komisionit statutor zgjidhen për një mandat prej 4 vjetësh;
5. Komisioni zgjedhë Kryetarin, nga radhët e anëtarëve të tij;
6. Komisioni i zhvillon mbledhjet nëse janë të pranishëm shumica e anëtarëve;
7. Mbledhjet e Komisionit mbahen sipas nevojës së paraqitur;
8. Anëtari i Komisionit i cili mungon në mbledhje pa arsye të justifikueshme, me propozimin e Kryetarit të komisionit mund të zëvendësohet nga Kryetari i BSPK-së me anëtarin nga lista rezervë.

Neni 32

Detyrat e Komisionit Statutar

1. Mbikëqyrë harmonizimin e dispozitave të statuteve të federatave/sindikatave me dispozitat e statutit të BSPK-së;
2. Siguron spastrimin e tekstit të statutit me vërejtje dhe ndryshime, të miratuar në Kongres;
3. Gjatë punës së tij, komisioni mund të kërkojë nga federatat sindikale, apo organet tjera të BSPK-së, që të kthejnë përgjigje brenda 8 ditësh për çështje të caktuara;
4. Komisioni vepron sipas kërkesës së Këshillit Drejtues, Kryesisë Ekzekutive dhe Kryetarit të BSPK-së; Komisioni Statutor merr vendime në mbledhjen e tij brenda 30 ditëve nga marrja e ankesës në procedurë të rregullt;

5. Komisioni miraton rregulloren e punës;
6. Dokumentet që nxjerrë komisioni statutor janë konkluzionet dhe vendimet;
7. Dokumentet janë përfundimtare dhe të detyrueshme në qoftë se për ta nuk parashtrohet ankesë brenda afatit të parashikuar;
8. Komisioni për punën e tij i përgjigjet Këshillit Drejtues;
9. Komisioni vendosë me shumicën e votave dhe punon në bazë të rregullores së punës;
10. Anëtarët e komisionit nuk mund të jenë në të njëjtën kohë pjesë e Këshillit Drejtues, Kryesisë Ekzekutive apo çfarëdo organi tjetër të BSPK-së.

Neni 33

Trupat organizative të BSPK-së

Trupat organizative të BSPK-së janë:

1. Komisioni për Zgjidhjen e Kontesteve;
2. Komisioni Disiplinor.

Neni 34

Komisioni për Zgjidhjen e Kontesteve dhe Ankesave

1. Komisioni për zgjidhjen e kontesteve dhe ankesave përbëhet prej 3 (tre) anëtarëve, njëri prej të cilëve duhet të jetë jurist, duhet të ketë përfaqësim gjinor dhe etnik nëse është e nevojshme;
2. Mandati i komisionit për zgjidhjen e kontesteve dhe ankesave është dy vite me të drejtë rizgjedhje edhe për dy vite;
3. Komisioni zgjedhë Kryetarin, nga radhët e anëtarëve të tij,
4. Komisioni mund t'i zhvillojë mbledhjet e tij nëse janë të pranishëm shumica e anëtarëve;
5. Mbledhjet e komisionit mbahen sipas nevojës pas paraqitjes së ankesave;
6. Komisioni brenda 5 (pesë) ditësh duhet të njoftohet për ankesat nga dita e parashtrimit të tyre;
7. Të gjithë shërbimet administrative për komisionin për zgjidhjen e kontesteve duhet t'i bëjë Shërbimi profesional i BSPK-së;
8. Pala e pakënaqur me vendimet e komisionit për zgjedhjen e kontesteve dhe ankesave, brenda 30 (tridhjetë) ditësh nga marrja e vendimit, ka të drejtë të ankohet në Këshillin Drejtues të BSPK-së.

Neni 35

Detyrat e Komisionit për Zgjedhjen e Kontesteve dhe Ankesave

1. Zgjedhë kontestet e natyrave të ndryshme duke u mbështetur në statutin e BSPK-së;
2. Vepron në bazë të parashtrimit të kërkesave nga palët e interesuara në kuadër të BSPK-së;
3. Palët e pakënaqura me konkludimet e komisionit mund të kërkojnë fillimin e procedurës pranë Këshillit Drejtues i cili merr vendimin përfundimtar;
4. Gjatë punës së vet komisioni mund të angazhojë ekspertë të lëmisë përkatëse me qëllim të zgjedhjes së drejtë të kontestit;
5. Organet e BSPK-së dhe të federatave/sindikave janë të obliguara që t'u japin ndihmë komisionit në formën që ai kërkon;
6. Komisioni për punën e tij i përgjigjet Këshillit Drejtues;

7. Komisioni vendosë me shumicën e votave dhe punon në bazë të rregullores së punës;
8. Komisioni brenda 30 dite, nga dita e parashtrimit të ankesës, duhet të sjellin vendimin mbi ankesën e shqyrtuar;
9. Anëtarët e komisionit nuk mund të jenë në të njëjtën kohë pjesë e Këshillit Drejtues, Kryesisë Ekzekutive apo çfarëdo organi tjetër të BSPK-së.

Neni 36

Komisioni Disiplinor

1. Komisioni Disiplinor përbëhet prej 3 (tre) anëtarëve, të cilët zgjedhën nga Këshilli Drejtues, njëri prej të cilëve duhet të jetë jurist, duhet të ketë përfaqësim gjinor dhe etnik nëse është e nevojshme;
2. Mandati i Komisionit Disiplinor është dy vite me të drejtë rizgjedhjeje edhe për dy vjet;
3. Procedura disiplinore mund të zhvillohet edhe ndaj të punësuarit në shërbimin profesional të BSPK-së, në këto raste:
 - a. Nëse kanë bërë shkelje të detyrave dhe përgjegjësive nga marrëdhënia e punës;
 - b. Në rast të sjelljeve të këqija në vendin e punës, mospërmbyshjes së kënaqshme të punëve dhe detyrave të punës, mungesës pa arsye nga puna për tri ditë radhazi;
 - c. Sipas fletëparaqitjes të ushtruar nga ana e udhëheqësit të tij;
 - d. Në rastet tjera të parapara në rregulloren mbi sistemimin e vendeve të punës të BSPK-së.

Neni 37

Detyrat e Komisionit Disiplinor

1. Komisioni duhet t'i zhvillojë mbledhjet e tij nëse janë të pranishëm shumica e anëtarëve, dhe vendimet duhet të merren në mënyrë unanime;
2. Komisioni zgjedhë Kryetarin nga radhët e anëtarëve të tij;
3. Komisioni i zhvillon mbledhjet nëse janë të pranishëm të gjithë anëtarët e tij;
4. Komisioni vendos në shkallë të parë;
5. Kundër vendimit të Komisionit, pala e pakënaqur mund të paraqesë ankesë pranë Kryesisë së BSPK-së, brenda 30 (tridhjetë) ditësh nga marrja e vendimit;
6. Mbledhjet e komisionit mbahen sipas nevojës pas paraqitjes së rastit disiplinor për shqyrtim;
7. Komisioni disiplinor duhet të sjellin vendimin mbi rastin e shqyrtuar brenda 30 dite, nga dita e paraqitjes së rastit për shqyrtim;
8. Vendimet e komisionit merren në mënyrë unanime;
9. Komisioni për punën e tij i përgjigjet Këshillit Drejtues;
10. Në mbledhjet e komisionit disiplinor merr pjesë edhe juristi i shërbimit profesional të BSPK-së, për tu siguruar rreth mbarëvajtjes së procedurave dhe për t'i asistuar lidhur me çështjet administrative.

Neni 38
Financimi i BSPK-së

1. BSPK-ja financohet nga:
 - i. Kuotizacioni i anëtarësisë sindikale;
 - j. Donacionet;
 - k. Ndihamat;
 - l. Mjetet e fituara;
 - m. Mjetet tjera që nuk janë në kundërshtim me dispozitat ligjore.

Neni 39
Pasuria e BSPK-së

1. Pasurinë e BSPK-së e përbëjnë mjetet e grumbulluara nga kontributet e anëtarëve të saj, si dhe gjithë pasuritë e luajtshme dhe të paluajtshme, të cilën e ka fituar, trashëguar apo blerë kudo që ndodhet ajo;
2. BSPK-ja mund të formojë njësi ekonomike, të cilat menaxhohen nga organet e saj.

Neni 40
Kuota e anëtarësisë

1. Federatat, anëtarët e BSPK-së paguajnë kuotën e anëtarësisë në BSPK, në pajtim me nenin 10, paragrafi 2 të këtij statuti;
2. Distribrimi proporcional i kuotës bëhet në mënyrë të drejtëpërdrejtë në konton përkatëse të BSPK-së;
9. Studentët që dëshirojnë të jenë anëtarë të sindikatës, duhet të paguajnë 1 € (një euro) në vit.

Neni 41
Shërbimi Profesional i BSPK-së

1. Shërbimi Profesional i BSPK-së duhet të kujdeset për kryerjen e punëve profesionale në interes dhe për nevoja të BSPK-së;
2. Shërbimi profesional përbëhet nga këta sektorë:
 - a. Profesional – Ligjor;
 - b. Financiar – Ekonomik;
 - c. Informimit dhe teknologjisë informative;
 - d. Për marrëdhënie me jashtë;
 - e. Administrativo - teknik.
3. Puna e Shërbimit Profesional përcaktohet me rregulloren mbi funksionimin e shërbimit profesional të BSPK-së të cilën e aprovon këshilli drejtues i BSPK-së ose Kryesia Ekzekutive sipas propozimit të Kryetarit të BSPK-së.

Neni 42
Ndërprerja e funksionit (mandatit) sipas fuqisë ligjor

Të zgjedhurve në organet e BSPK-së i përfundojnë funksionet e tyre në këto raste:

1. Me dorëheqje;
2. Me vdekjen e të zgjedhurit;

3. Me skadimin e mandatit;
4. Kur i zgjedhuri e mbush moshën e pensionimit prej gjashtëdhjetë e pesë (65) vjeç;
5. Në ditën e dorëzimit të aktvendimit të plotfuqishëm për vërtetimin e humbjes së aftësive për punë;
6. Nëse i punësuari shkon në vuajtje të dënimit, i cili do të zgjasë më tepër se gjashtë (6) muaj
7. Rastet e tjera të përcaktuar sipas dispozitave të këtij statuti dhe ligjeve në fuqi.

Neni 43

Dispozitat kalimtare

1. Statuti është akti më i lartë juridik i BSPK-së dhe hynë në fuqi pas miratimit të tij nga delegatët e Kongresit dhe nënshkrimit nga Kryetari i BSPK-së;
2. Sindikatat/federatat obligohen që të bëjnë harmonizimin e Statutit të tyre me këtë Statut, në një periudhë kohore brenda 6 muajsh nga dita e hyrjes në fuqi e këtij statuti.

Neni 44

Vlefshmëria e këtij Statuti

1. Me këtë statut rregullohet mënyra e organizimit dhe fushëveprimit të organeve të BSPK-së;
2. Statutet e federatave/sindikatave nuk mund të jenë në kundërshtim me parimet themelore të statutit të BSPK-së;
3. Iniciativën për ndryshim apo plotësim të statutit mund ta iniciojë 1/3 e delegatëve të Kongresit, Kryetari i BSPK-së, Këshilli Drejtues dhe Kryesia e BSPK-së.

Neni 45

Sqarimin e dispozitave të këtij Statuti e bënë Komisioni Statutar dhe Kongresi i BSPK-së.


Neni 46

Ky Statut hynë në fuqi ditën e miratimit dhe nënshkrimit nga Kryetari i BSPK-së.

Kryetari i BSPK-së

Prishtinë

Prof. dr. Atdhe Hykolli



4 tetor 2021

